

Augsburg, 13. Januar 1558

An Johannes Oporinus

UB Basel, Fr. Gr. I 11, fol. 215r.

Steinmann Nr. 707.

Lit.: Husner S. 153.

S. P. D. Vtinam a Weitmosero sic accepti essetis, vt tantas opes decet. Malignius hic vos tractatos esse, non profectò vobis magis quam mihi dolet. Vos huc non reuersos esse, non miror. Neque enim κόμποι μάταιοι tanti sunt, et nos Calmuseri nihil magnopere vobis praeter benevolentiam praestare possumus. quae vt grata vobis sit, parum tamen vos iuuat. ἀλλὰ τὰ μὲν προτετύχθαι ἔασσομεν, ὀχνύμενοί περ. Bibliothecae tuae hic distrahendae nulla spes est. Indices si voles repetam, et aut ad te mittam, aut, si publicam Bibliothecam aedificari videro, cum meis indicib[us] conferam, operamq[ue] dabo, vt meae ditionis fiat Bibliotheca Oporini, et publice omnibus proposit, quemadmodum possessor eius Oporinus, non sibi sed alijs viuit. Quae in Isocrate vel a Clausero vel a Neandro excudisti prima occasione ad me mitti velim. Parturio iam annos amplius nouem annotationes in Isocratem et Demosthenem. Cuius laboris parte si isti me leuarint, ματαιοπονίαν vitabo. Statui tamen Isocraticam conuersionem adhuc semel percurrere, et quae annotaro, intra mensem ad te mittere. quae vt in fine adiungas oro. Xylandro nostro morem gerere non possum in euoluendo Diodoro Graeco. Tot mihi impedimenta obijciuntur, vt nec mea studia curare vacet. Vale cum omnibus tuis, amicis salutem meis verbis dicas velim. Augustae. Raptim. Idib[us] Ianuarij 1558.

Hiero[nymus] Wolfius  
Tuus.